

## Ang Sulat Ni

# JUDAS

<sup>1</sup> Ako si Judas, igsoon ni Santiago ug alagad ni Jesu-Cristo. *Nangumusta ako* kaninyong mga tinawag sa Dios nga mahimong iya, kamo nga ginahigugma sa Dios nga Amahan ug giampingan ni Jesu-Cristo

<sup>2</sup> Hinaut nga madawat ninyo ang dugang pa gayod nga kaluoy, kalinaw ug gugma *sa Dios*.

*Ang Mini nga mga Magtutudlo sa Dios*

<sup>3</sup> Mga hinigugma, gusto ko gayod unta nga magsulat kaninyo bahin sa kaluwasan nga atong nadawat, apan nahunahunaan ko nga mas kinahanglan gayod nga sulatan ko kamo nga magmaisogon sa pagpakigbatok sa mga tawo nga buot motuis sa mga pagtulon-an mahitungod sa atong pagtuo. Kini nga mga pagtulon-an gihatag na sa Dios ngadto sa iyang mga katawhan ug dili na gayod kini usabon.

<sup>4</sup> Gisulatan ko kamo niini tungod kay may mga tawo nga sa hilom miipon diha kaninyo. Dili sila diosnon ug tuison nila ang tinuod nga mga pagtulon-an mahitungod sa grasya sa atong Dios aron makapatuyang sila sa pagbuhat ug malaw-ay.<sup>a</sup> Gilimod nila si Jesu-Cristo nga mao lamang ang atong Agalon ug Ginoo. Nahisulat nang daan kaniadto pa nga kini sila silotan.

<sup>5</sup> Bisan nasayran na ninyo, gusto ko pa gayod nga pahinumdoman kamo nga giluwes sa Ginoo ang mga Israelinhon sa Ehipto, apan sa kaulahian gipamatay niya ang uban kanila tungod kay wala sila motuo kaniya. <sup>6</sup> Hinumdomi usab ninyo ang mga anghel nga wala magpabilin sa ilang naandang katungdanan, ug mibiya hinuon sa ilang puloy-anan. Mao kadto nga gipagapos sila *sa Dios* sa mga kadena nga dili mabugto ug gibilanggo sa lawom ug mangiob nga dapit hangtod nga moabot ang adlaw sa paghukom sa Dios kanila. <sup>7</sup> Hinumdomi usab ninyo ang mga tawo sa Sodoma ug Gomora ug ang kasikbit nga mga lungsod niini. Nagpakasala usab sila sama niadtong mga anghel. Kay gusto sa mga tawo sa Sodoma ug Gomora nga makighilawas sa dili nila asawa o bana o bisan gani sa dili tawong sama kanila. Kadtong kalayo nga gisilot kanila pasidaan ngadto sa mga daotan nga sa ulahing mga adlaw may silot nga walay kataposan diha sa kalayo nga walay pagkapalong.

<sup>8</sup> Ingon usab niini nga mga tawo ang giingon kong miipon sa hilom diha kaninyo. May mga panan-awon sila nga nagatukmod kanila sa pagpakasala sa ilang kaugalingon nga lawas. Ug tungod usab niining ilang mga panan-awon, dili sila magpasakop sa Ginoo ug ginatamay nila ang gamhanan nga mga binuhat.<sup>b</sup> <sup>9</sup> Bisan gani si Miguel nga pangulong anghel wala maghimo ug sama niana. Kay paglalis nila ni Satanas kon kinsa kanila ang mokuha sa patay nga lawas ni Moises, wala siya mangahas nga hukman si Satanas nga silotan tungod sa iyang pagpasipala kang Moises. Ang giingon lang niya, “Ang Ginoo ang mobadlong kanim!”<sup>10</sup> Apan kana nga mga tawo nagtamay sa mga butang nga wala nila masabti. Sama sila sa mga mananap nga walay hunahuna, kay wala silay lain nga ginasonod kondili ang ilang naandan nga mga ginabati, nga maoy maglaglag kanila. <sup>11</sup> Alaot sila! Kay gisunod nila ang batasan ni Cain. Ug gisunod usab nila si Balaam, kay bisan nasayran nila nga daotan ang ilang ginabuhat nagpadayon pa gihapon sila tungod sa ilang kahakog sa kuwarta. Parehas usab sila kang Core nga nagrebelde sa Dios, busa silotan usab sila sama kaniya. <sup>12</sup> Kana nga mga tawo nagadaot sa inyong panagtigom sa pagpangaon isip managsoon diha kang Cristo. Kay nagapatuyang lang silag kaon ug inom ug wala silay kaulaw. Ang ila lang kaugalingon ang ilang gihunahuna. Parehas sila sa dag-om nga gipalid sa hangin ug wala magdala ug ulan. Parehas usab sila sa kahoy nga wala mamunga bisag panahon sa tingpamunga. Gipangibot sila ug patay na gayod. <sup>13</sup> Parehas sila sa kusog nga balod, ug ingon nga makita ang bula nga mogawas sa mga balod, makita usab ang ilang mga makauulaw nga binuhatan. Parehas sila sa mga bituon nga nahisalaag. Busa may lugar nga mangitngit kaayo nga gitagana *ang Dios* alang kanila. Ug didto sila sa walay kataposan.

<sup>a</sup> *4 Nagatuo sila nga walay kaso bisan malaw-ay ang atong mga ginabuhat, kay maluloy-on ang Dios, busa pasayloon niya kita.*

<sup>b</sup> *8 gamhanan nga mga binuhat: tingali ang buot ipasabot, daotan nga espiritu.*

<sup>14</sup> Si Enoc nga ikaunom nga kaliwat ni Adan nagtagna na bahin kanila. Miingon siya, “Moabot ang Ginoong kauban sa iyang linibo ka mga anghel <sup>15</sup> sa paghukom sa tanan, ug sa pagsilot sa mga dili diosnon tungod sa ilang daotan nga mga binuhatan, ug tungod sa mga daotan nga mga pulong nga gisulti nila batok kaniya.”

<sup>16</sup> Kana nga mga tawo mga bagulbolan. Dili sila kontento sa ilang kahimtang, ang ila lang kaugalingon nga mga tinguha ang ilang gipalabi, mga hambugero sila, ug giulog-ulogan nila ang uban aron makuha nila ang ilang gusto.

#### *Ang mga Pahimangno*

<sup>17</sup> Apan mga hinigugma, hinumdomi ninyo ang giingon kaninyo kaniadto sa mga apostoles sa atong Ginoong Jesu-Cristo. <sup>18</sup> Dili ba nag-ingon sila nga, “Sa ulahing mga adlaw motungha ang mga tawong magbiaybiay kaninyo, ug ang ilang sundon mao lang ang ilang daotan nga mga tinguha.” <sup>19</sup> Mao kana nga mga tawo ang maghimog paagi nga kamong mga tumutuo magkabahin-bahin. Ginagamhan sila sa ilang tawhanong kinaiya. Wala kanila ang Espiritu Santo. <sup>20</sup> Apan kamo mga hinigugma, paglig-onay kamo sa inyong balaan nga ginatuohan. Pag-ampo kamo nga giniyahan sa *gahom sa Espiritu Santo*. <sup>21</sup> Pabilin gayod kamo diha sa gugma sa Dios samtang nagahulat kamo sa kinabuhi nga walay kataposan nga ihatag sa atong Ginoong Jesu-Cristo tungod sa iyang kaluoy. <sup>22</sup> Kaloy-i ninyo ang mga nagaduhaduha. <sup>23</sup> Tabangi ninyo sila aron maluwas sila gikan sa silot, sama nga nagasakmit kamo sa usa ka butang nga hapit nang masunog. Kaloy-i ninyo bisan ang mga tawo nga daotan ug binuhatan, apan kapungti ninyo ang ilang mga binuhatan. Pagbantay kamo kay bisan gani ang ilang mga bisti hugaw atubangan sa Dios.

#### *Pagdayeg ug Pagpasalamat sa Dios*

<sup>24</sup> Ang Dios makahimo sa pagbantay kaninyo aron dili kamo mahulog sa pagpakasala, ug madala niya kamo nga walay ikasaway ug malipayon gayod ngadto sa iyang presensya! <sup>25</sup> *Dalayegon gayod siya!* Siya lang gayod ang Dios ug atong Manluluwas pinaagi kang Jesu-Cristo nga atong Ginoong. Kaniya ang kadunganan, pagkahalangdon, gahom, ug katungod sukad pa sa sinugdan, karon, ug sa walay kataposan! Amen.